



Sujet: 1997

„Eus fehlt’s euch fehlt’s wiso fehlt’s?“

Liebi Lüt eus het’s quählt
 Will es het lang e’ Sujet gfehlt
 So hän mir gsait: „Wämer wette
 S’ Sujet chunnt mit dr Balgette.“
 Gfunde hän mir’s mit Verstand
 S’ ligt au uf dr Hand
 Drum wänn mir’s das Joor woge
 Stelle e paar kritisch Froge.

Drum z’erscht zu eusem Wage
 mir dörfe euch das ruhig sage
 er isch halt nur us Stroh
 do drüb’r sin mir chaibe froh
 zum Glück sin mir däm sowyt
 uns het’s das Joor gfehlt a dr Zyt
 goht das so wyter, s’ isch nur e Traum
 fiire mir bald Fasnacht unter’ m Wiehnachtsbaum.

Die vo dr AS sin nit ganz ideelos
 Probiere öbis neus, s’ isch famos
 Am Zyschtig-Obe es Guggekonzärt,
 feschte in dr Dorfturnhalle, s ich viel wärt
 mir gänn dr Vreni Sutter au e Schmutz
 dr Ytritt isch gratis choschtet kei Stutz
 am Schluss duet d’ AS jammere: „Mir verdiene nüt
 s’ fehlt das Joor wider an Lüt.“

Die erschte 2 Tag vom Schwingerfescht sin in d'Hose
So hän mir us sichere Quellechönne lose
vom Samschtig dien mir euch sälber verzehle
dört hets gfehlt bim dörfe bstelle
für eus unerklärlich und e Quahl
by 30 Gäscht und öbe 70 Personal.

Bim öffne vo de Stüre sin mir verschrogge
E mega lange Brief eus haut's us de Sogge
Uff em Yzalligsschin s'freut alli sehr
Fehlt dr Betrag; er isch leer
denn als Prattler Stürzahler bisch e Dotsch
dörf yzahle was de wotsch
mir froge jetzt mit guetem Gwisse
fehlt's dr Stürverwaltig ächt am Computerwisse.

In d'Schützestube so hän mir vernoh
Würded mitlerwile d^Verein nümmi go
das duet eus ehrlich gar nit erstune
het dr Wirt doch sälte gueti Lune
im Fehlt: s'isch dr bescht
s'Fingerspitzegfühl für sini Gäst.

Kensch vo däm Joor dr gröschti Lacher
sin die flissige Kreiselmacher
mir sin oft uf Liestel mit em Chare
händ immer miese anderscht fahre
eines Tages us Dummheit pur
stoht ufem Kreisel e Skulptur
neuerdings het dr Schweizer d'Finger im Spiel
das finde mir eifache bizeli zviel
drumm hän mir scho e neu Figur bstellt
will sit dr Schufflekunscht uns die alti fehlt.

Ob Milionär, Arbeiter oder Schlampe
alli kenne s'Polizeiauto mit ibauter Lampe
wil eus dä Radar unheimlich duet quähle
mues uf däm Zettel e Värs vo de Prattlerschugger fehle.

Bim Fc Prattele mir blibe derby
sin die beschte Zyte au scho lang verbie
dien in dr 3.Liga umegammle
vergässe au no Püktli sammle
drum het de Verein al Joor en Stress
s'fehlt halt Ein wo en Stopt, dr Fc Prattele Abstiogs-Express.

Alli kenne dr neu Schwizer Tennisstern
au mir hän'd Martina Hingis gärn
sie spielt guet Tennis das wänn mir nit in Frog stelle
numme bim rede dien e paar Wörtli fehle
drumm hänn mir fescht an d' Martina dänkt
und ihre uf d' Wiehnacht e Sprochkurs gschänkt.

Hösch Digge hän mir dr scho s'neuscht verzählt
hesch scho eusi mitgmachte Umzüg zählt
bisch au uf nünmol mitmache cho
so hesch es bim rechne gnau gno
das heisst es fehlt 1 Fasnacht, muesch nit flueche
denn chönne mir sage; „**10 joor Dorfplatzrueche**“.